

بِسْمِ اللَّهِ الرَّحْمَنِ الرَّحِيمِ



Khutba Jumma

Hazrat Khalifatullah Munir. A. Azim (atba)

22 Novembre 2019
24 Rabi'ul Awwal 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

[VISITE À MADAGASCAR](#)

Par la grâce d'Allah, mo fine retourner depuis Madagascar après ene semaine et mo bizin dire ki par la grâce d'Allah, c'est ene succès de côté d'Allah. **La Ghaliba Illallah**. Kan mo fine rentre dans Madagascar mo bane disciples fine recevoir moi dans ene l'atmosphère émotionnel parski dernier visite ki mo ti faire dans Madagascar c'était en 2015. Zot fine exprime zot ouvertement, couma zot fine trouve zot bien triste kot Allah So Khalifa pas pé vine visite zot. Ti ena tellement l'émotion lors zot visage et larmes dans lizié et de l'autre côté ene la joie extraordinaire, et même kan mo pé quitte zot pour retourne à Maurice, zot ti bien triste et zot pas oulé ki mo retourner si vite coumsa ; zot ti oulé ki mo reste parmi zot encore et encore.

Donc, mo péna mots pour décrire séki fine passer pendant sa ene semaine là. Mo pas conner même kot bizin commencer et kot pour terminer tellement ti ena bane l'évènements extraordinaire.

Parmi beaucoup bane signes ki Allah (swt) fine manifester et mo bane disciples dans Madagascar fine témoigner, ene parmi séki nous pé alle dans ene village ki bien bien loin et la nuit pé approcher. Ene de mo bane disciples ki appelle Nasir, ki étudier dans l'université, parmi zot tous dans transport, li dire : « *Ô Khalifa d'Allah, nous pé passe dans ene l'endroit ki bien rare la pluie tomber, et bane dimounes et zanimos et légumes souffère beaucoup tellement rarement la pluie tomber. Faire duah ki Allah (swt) béni sa village là et la pluie tomber.* » Donc, kan li fine dire sa, mo fine dire li : « *Ok, nous faire duah* », et pas ti encore faire noir, ene chaleur terrible et soleil bien fort (couma nous dire en créole, soleil pé brile nous et la cervelle pé fonne).

Mo fine lève mo la main faire *duah* dans sa village là. Kan mo fine terminer, après ene 10 minutes, le temps assombri et ene coup fer noir partout, ene zéclair manifester et tous fine gagne peur avec bane bel l'orages – séki pli grand miracle là-dans, kan zéclair manifester sa donne ene l'éclairage extraordinaire. Nous conner kan zéclair manifester dans le ciel, couma li manifester pour quelques secondes avec bane grands bruits (tonnerres). Mais sane manifestation zéclair là li donne ene extra l'éclairage ki tous dimounes fine reste guette dans les ciel et le plus grand miracle là-dans, c'est ki pas mo tousel ki fine trouve sa ; zot tout fine trouve sa et moi mo fine reste tranquille et zot tous fine dire, guette dans les ciel le nom d'Allah manifester en lumière et après 5 minutes, ene gros la pluie fine tomber. Par la suite, sa la pluie là fine contigner tomber pendant 5 jours kot tous dimounes fine profiter.

Donc, *Alhamdulillah Summa Alhamdulillah* (Par la grâce d'Allah), ene semaine dans Madagascar kot le Jamaat Ul Sahih Al Islam fine faire bane progrès spirituel ki pas capave décrire en quelques mots. Tellement de bane grâces et bane faveurs divines ki pas capave même dire sa en quelques mots, couma Allah Li Grand, So faveurs aussi bien bien grand.

Nous fine travaille bien dur ensemble avec mo bane disciples. Couma zot conner ki Madagascar li bien bien grand. Couma ena bane historiens fine dire ki Madagascar li deux fois pli grand ki la France.

Fine ena ene l'autre anecdote ki fine arriver encore ene l'autre jour, pendant nous voyage vers ene l'autre grand village. Fine arrive l'heure *Namaz Maghrib* et nous fine arrêter pour faire *Namaz [Salaat]*. Kan fine termine le *Namaz*, ene la lumière manifester dans le ciel et tous ensemble fine trouve le nom d'Allah encore ene

fois dans le ciel et par la grâce d'Allah, le Jamaat Ul Sahih Al Islam de Madagascar, avec sa visite ki mo fine faire là, le Jamaat fine grandi 5 fois plisse ki en 2013 et 2015. *Alhamdulillah, Summa Alhamdulillah.*

Actuellement mo capave dire nous ena 3 Masjeeds, et nous ena pour construire bane *Madrassa* pour l'éducation spirituelle de nous bane zenfants, et bizin faire encore bane toilettes et au moins deux salles de bain et aussi le *Wa'zu Khana*, et nous bizin clôture la cour Masjeed et aussi le bureau et ene Committee Room et bizin dire *Alhamdulillah, Summa Alhamdulillah*, c'est bane donations terrains ki bane disciples fine donne le Jamaat et tous papiers fine faire légalement et aussi ene Masjeed en construction et ena problème de l'eau dans sa bane villages là, pé bizin fouiller 12 à 15 mètres pour tire de l'eau sous la terre (pour faire puits).

Par la grâce d'Allah, avec sa visite là dans deux province mo fine faire Jalsa Salana kot fine ena bane nouveau membres. Mo bizin dire ki mo bane disciples fine faire bane grands travaux de *Dawa* là-bas – malgré zot bien pauvre, péna les moyens, mais zot fine marcher jours et nuits, traverse dans bane la forêt alle donne le message de **SAHIH AL ISLAM** et Manifestation Divine. Zot capave bien pauvre mais zot l'amour pour Allah et So *Khalifa* bien riche. Zot tous conner ki c'est ene pays bien pauvre; so peuple passe beaucoup misère. Zot fine marcher beaucoup jours et nuits donne le message de l'Islam et beaucoup de bane les zot religions fine converti à l'Islam, kot maintenant zot dans le Jamaat Ul Sahih Al Islam et par la grâce d'Allah mo fine zoine zot tous kot mo fine aller et mo fine faire moi ene devoir pour zoine zot tous. Mo fine extra content trouve zéffore ki mo bane disciples fine faire et par la grâce d'Allah mo fine réussi faire le *Seerat-un-Nabi* (saws) dans ene l'autre village kot nous Masjeed en construction. Mo bizin dire ki nous fine gagne plisse ki 1500 converti prend le *Bai'at* dans la main du Khalifatullah, *Alhamdulillah, Summa Alhamdulillah.*

Et aparte sa fine ena bane *Mulaaqat* dans 3 différents provinces et fine faire 3 Amila et fine choisir bane office-bearers et aussi 3 Amirs dans sa bane provinces là. Par la grâce d'Allah, zot fine bien content et dire moi remercier nous bane frères, et sœurs de l'Inde (Tamil Nadu, Kerala, Delhi etc.) pour zot contribution et zot l'amour ki zot fine montrer pour nous ici à Madagascar, et mo capave dire ki zot tous fine zoine moi ensam fine faire beaucoup *duahs* pour tous mo bane très chers disciples dans l'Inde : Tamil Nadu – Melayapalam, Trichy, Kottar etc., et Kerala – Mathra, Kannur, Alappuzha, Kaliyikkavila, Palakkad etc.

Avant mo termine sa 1^{er} partie Khutba Jummah là, Abdul Muhaymine ti faire le Jummah semaine dernière dans mo l'absence. *Alhamdulillah*. Et l'autre zaffaire, à sak fois le Naib Amir de Kottar, Tamil Nadu Shahul Hameed Faisal Sahib, so madame Hamda Sahiba, Naib Sadr Faheema Sahiba et so bane zenfants et les autres encore dans Kottar, à sak fois zot envoie moi bane rapports ou bane zaffaires personnel, au commencement zot faire ene *duah* ki mo bien apprécier et content kot zot faire sa *duah* là pour Allah So Khalifa (le Khalifatullah) :

May Allah bestow upon you good health, long life and success in each and every step of you towards the victory of Islam. [*Ki Allah accorde ou ene bon la santé, ene longue la vie, et succès dans sakaine de ou pas vers la victoire de l'Islam.*] *Ameen Summa Ameen.*

Sa *duah* ki zot faire pour moi là, moi aussi mo faire sa même *duah* pour zot et ki zot réussi dans le travail de *Deen-e-Islam*, le *Deen* d'Allah.

Subhaana Rabbinaa in-kaana wa-du Rabbinaa la mafuulaa.

Gloire à nous Maître, promesse nous Maître fine réaliser.

Hamdu Lillah ! Wa Kabbirhu takbiiraa !

Gloire à Allah ! (Nous bizin) Faire So Louanges et rappelle So grandeur.

MUHAMMAD EN TANT KI LA PERSONNALITÉ POLITIQUE KI ULTIMEMENT VRAI ET PARFAIT

Dans politique, beaucoup de bane dimounes aujourd'hui gagne peur pour l'avenir de zot propre pays ainsi ki celui de zot générations [futures] et de la population en général de zot pays. Saki nous trouver de nos jours, c'est ki bane droits de l'homme fine être délaissé pour la politique de l'argent et le pouvoir de celui ki pli fort [matériellement parlant], en particulier dans le domaine de la corruption.

C'est effectivement ene sujet bien délicat pou développer [pareil couma mo ti fini commence adresser dans mo bane Khutba Jummahs], mais li certainement très important, parski la politique, ene vraie politique ki pure et inchanger [ki personne pas capave changer] li vraiment important pour ene bon gestion quotidien de nous société, ki li au niveau nationale et aussi au niveau mondiale.

Même si bane bons dimounes, ki ena ene bon conscience et ene l'esprit clair zot faire zeffore pou déracine bane mauvais l'herbes de la société et zot rode transforme le monde politique pour faire li vine ene meilleur place pour la bonne gestion du pays, mais selman malheureusement, zot gagne cogner plus devant contre plusieurs de bane obstacles. Ene de sa bane obstacles là c'est l'argent, le pouvoir de l'argent, so pouvoir pou acheter la conscience de bane dimounes et pou mette de côté l'honnêteté et la moralité et pou obéir bane ki corrompus couma dire c'est sa bane là ki contrôle zot conscience et la vie. Li bien malheureux ki nous société d'aujourd'hui, dans so globalité, pé dégrader de jour en jour et so bane mals pé vine de plus en plus présent et pé envahir partout à ene tel point ki la loi et l'ordre [law and order] zot également corrompus dans nombreux de bane pays du monde et kot zot incapables pou fonctionner correctement pour défanne le meilleur intérêt de la nation et du monde. Bane peuples du monde pé souffère à cause de sa mauvais gestion de zot bane sociétés individuelles, ki à so tour ena ene mauvais répercussion lor la société mondiale.


Par la grâce de Dieu Tout-Puissant [Allah], l'Islam fine prend [et ena] bane mesures nécessaires pour transforme ene société et pour assure so bon fonctionnement, et tout le mérite révine à Allah Le Tout-Puissant à travers So bane commandements ki Li fine révéler et établir à travers bane siècles et ki fine être perfectionné dans le livre glorieux et parfait, le Quran Shareef, et mis en pratique par nul autre ki le meilleur et le sceau de tous bane prophètes, Hazrat Muhammad (saws).

Bien ki beaucoup de bane dimounes pas croire dans l'islam en tant ki ene credo et la foi, zot pas capave toutefois nier ki c'est sa même l'islam là, avec l'application de tous so bane vrai éthique et tous so bane commandements – *so bane commandements authentiques, et non pas couma saki bane dimounes fine fer li dévini* – et couma Allah (swt) et So noble prophète Muhammad (saws) fine enseigner, alors sa l'islam là fine concevoir et applique bane telles grands la lois et bane compétences de gouvernement/ gouvernance [pou gère ene gouvernement et ene pays] ki ena le pouvoir pou change le visage de la société pour le meilleur. Mais malheureusement, après la disparition du Saint Prophète Muhammad (saws), personne pas fine gouverne zot territoires [zot pays] et zot l'états de manière aussi parfait et persévérant couma le Saint Prophète Muhammad (saws).

Anou guette ene aperçu d'ene de bane aspects principales de la mission du Saint Prophète.

MUHAMMAD: LE MEILLEUR HOMME D'ÉTAT

Allah (swt) dire dans Quran Shareef :



Laqad kaana lakum fii Rasuulil-laahi uswatun hasanatul-liman kaana yarjullaaha wal yawmal aakhira wa zakarallaaha kasiiraa.

« Zot ena dans le Prophète d'Allah ene modèle parfait pour celui ki espère en Allah et au Jour dernier et ki rappelle Allah beaucoup. » (Surah Al-Ahzab 33: 22).

Pour vine ene modèle ti veut dire ki le Saint Prophète (saws) pas ti bizin seulement vine ene vrai l'exemple et ene l'exemple idéal de piété et de dévotion envers Allah (swt), mais sa ti aussi veut dire ki li ti bizin protége la communauté de l'Islam contre so bane l'ennemis et rendre sa communauté ki ti élever par Allah assez fort pour tenir li deboute, pour faire li vine indépendant, et capable pou épanouir, progresser, et grandi et pou survivre grâce à ene canalisation appropriée de bane fonds, de sorte ki la trésorerie [*Baitul Maal*] – ki représente bane contributions de bane croyants ainsi ki bane *Zakaat* et *Sadqua* ki fine ordonnés par Allah – capave être servi dans ene bon façon. En effet, Allah (swt) Li pli conner ki zot tout ; Li-même Li ena tout connaissance de sa, parski petit à petit pendant toute la vie même du Saint Prophète Muhammad (saws) bane croyants de la péninsule Arabe fine multipliés et zot nombre fine continué augmenter pendant la période de bane *Khulafa-e-Rashideen* (califes bien-guidés).

Mais pour dire ki toute l'Arabie fine vine musulman li pas tout à fait correct, mais nous bizin comprend ki l'islam en tant ki mode de vie, en tant ki credo et la foi, et en tant ki ene système de gouvernement fine vine ene partie intégrante de la vie quotidien de bane Arabes. Bane croyants et même bane non-croyants, en particulier à partir de la conquête de la Mecque pendant le vivant même du Saint Prophète Muhammad (saws), ti bizin laisse zot gouverner par bane la lois d'Allah et, couma mo ti fini dire zot dans mo Khutba Jumma du 8 novembre 2019, l'Islam li seule la foi et le seul système de gouvernement ki soutenir la liberté de la foi et bane la lois internationales. L'Islam respecter bane les autres religions et,

conformément à bane commandements clairs d'Allah concernant l'acceptation de l'Islam, faudé personne jamais forcer pour accepter l'islam et pour croire dans tous bane commandements d'Allah (swt) tels couma zot fine être révélés dans le Quran Shareef.

DE LA JUSTICE À LA CORRUPTION

Dans bane premiers l'années de l'islam, et même avant, bane conquêtes de bane territoires ti pratiqués en grand nombre par bane non-musulmans, en particulier en temps de guerre. C'était la tendance ou le mode de vie de sa l'époque là. Kan bane musulmans ti gagne persécution à ene niveau ki zot népli capave supporter, z'est zis à travers bane commandements divines ki le prophète Allah (Hazrat Muhammad (saws)) fine prend zarmes pour défendre la communauté de l'islam et le véritable credo [vrai la foi]. Beaucoup de bane musulmans ti persécuté à cause de zot la foi dans le *Tawheed* (l'unicité d'Allah). Le peuple arabe pas ti capave comprendre le concept d'ene seul Dieu alors ki zot ti pé adore bane nombreux idoles. Zot fine depuis longtemps oublié bane l'enseignements de Hazrat Ibrahim (as) et de so garçon Hazrat Ismaël (as).

En tant ki ene vrai garçon de so pays, et avant tout en tant ki messenger d'Allah ki ti pé agir sous bane l'instructions divines, Hazrat Muhammad (saws) fine ensuite fonde l'islam en tant ki ene mode de vie **COMPLET** et **PARFAIT**. L'islam li ene telle système ki fine établi par Allah ki envahir tous bane domaines de la vie de l'homme pour réforme li et enseigne li vraie façon couma pour vivre désamment, avec la crainte d'Allah dans le cœur et pou persévérer dans so bane zefforts pour gagne so la vie [pour travail pour ki li gagne le moyen pour vivre so la vie] et contribuer pour faire so foyer et so pays prospérer sous la bonne gestion de bane pieux ki fine applique correctement bane la lois d'Allah dans l'Islam.

Bane pactes, bane traités, bane accords ti respecté. Personne pas ti forcé pou accepter l'islam. Bane ki fine croire après zot non-croyance ti vine ene partie intégrante de l'islam et zot ti bizin régir par bane la lois de l'islam [c'est-à-dire, ki zot ti sous la gouvernance de l'islam] et bane ki pas ti accepté l'islam ti bizin conforme zot à bane la lois du pays, ki ti gouverner par l'islam [ki ti sous contrôle de l'islam]. Pourtant, comme l'islam li pas ene système ni ene la foi ki servi la force, alors zot ti capave pratique librement zot la foi sans crainte de répression ni même d'oppression.

C'est beaucoup plus tard, à cause d'une mauvaise gestion à la tête de l'État islamique, sous la conduite de bane dimounes corrompues, que les vrais enseignements de l'islam ont été mis de côté pour que les bane dimounes assoiffés de pouvoir puissent prendre la loi dans leurs mains. Yazid bin Muawiyah à l'époque de Imam Hussein (ra) est un exemple frappant de ça.

Il faut rapporter que le Saint Prophète Muhammad (saws) a dit: « *'Nabuwwat pou reste parmi zot aussi longtemps que Allah veut. Après ça Khilafat basé sur le précepte de Nabuwwat pour commencer, et pour rester aussi longtemps que Allah veut. Après une monarchie corrompue prend place, et pour rester aussi longtemps que Allah veut. Après ça, pour une règne de bane léros tyrannique, et là pour rester aussi longtemps que Allah veut. **Après pour une Khilafat qui est basé sur le précepte de Nabuwwat.*** » (Ahmad).

Ça c'est le cycle de la vie de ce monde là. Une pureté qui se manifeste quand un prophète d'Allah vient, quand il réforme par la volonté d'Allah le système corrompu qui existait avant lui. Tous les systèmes tiennent également purs au commencement, mais avec le temps, ils sont corrompus par les mains des bane dimounes. Après que le prophète a purifié le *Deen* d'Allah, alors petit à petit, les bane dimounes en grands nombres vont intégrer la communauté d'Allah sous la bannière de son prophète qui est mort là, alors ils ont leur propre conception de son enseignement là. Ils tombent alors dans la perdition et entraînent les autres avec eux dans ce trou de désespoir là. Après le départ de Jésus (as) à la recherche des tribus perdues de la Maison d'Israël et au-delà de ça, Paul s'est proclamé lui-même apôtre (disciple) de Jésus avec une étrange autorité en lui-même pour gouverner les chrétiens.

C'est donc un cycle. En effet, ils sont chanceux, tous ceux qui témoignent l'époque d'un prophète d'Allah. Alors que la porte de l'avènement des bane prophètes porteurs de loi est complètement fermée, apparaît une zis la porte de l'avènement des bane prophètes non-porteurs de loi, car c'est les bane vrais héritiers du Saint Prophète Muhammad (saws), pour réformer les bane dimounes dans l'Islam et pour amener zot au sommet de la vraie foi dans Allah et dans Sa unicité.

Le Saint Prophète Muhammad (saws) est le sceau de tous les bane prophètes et, comme il a été déclaré dans Hadith que moi-même ne mets devant zot, il informe

so bane compagnons et bane croyants en général ki faudé pas zot désespérer parski après la corruption, Allah pou ré-établir bane tels prophètes ki pour en même temps so bane disciples/ suivants par excellence; zot pou d'ene côté *Khulafatullah* (califes d'Allah) et également bane représentants du Saint Prophète Muhammad (saws), so bane véritables héritiers spirituels et bane bons gestionnaires du système de l'Islam dans so l'ensemble, en termes de credo, de foi et de bane lois gouvernantes afin pour maintenir la loi et l'ordre dans le pays et dans le monde. C'est sa Allah, le meilleur des planificateurs. Li fine mette au point ene tel système, à la fois religieux / rempli de la foi, et à la fois matériel (mondaine) [l'Islam], kot sa système là [l'islam] conne très bien couma pou gouverne le monde selon bane préceptes divines. Mais malheureusement, bien tiguitté dimounes ki comprend sa.

Ki Allah maintenir toujours haute l'honneur du Saint Prophète Muhammad (saws) et maintenir so sceau de prophétie intact face à tout bane impureté ki dimounes fine jette lor li, et ki le monde réalise ki l'islam ki la meilleure façon de vivre et zot commence à agir selon bane commandements d'Allah d'ene vrai façon afin ki le monde pas sombrer dans ene profond désespoir à cause bane machinations [mauvais plans] de bane démons dans tous zot bane formes. Ki Allah permette à bane vrais croyants pou équipe zot physiquement, mentalement et spirituellement pour zot amène sa combat spirituel là en zot-mêmes et avec les autres, afin ki tous bane voiles capave tomber et ki bane dimounes capave trouve l'Islam dans so vrai splendeur. *Insha-Allah, Ameen.*

بِسْمِ اللَّهِ الرَّحْمَنِ الرَّحِيمِ
 اللَّهُمَّ صَلِّ عَلَى مُحَمَّدٍ
 وَعَلَى آلِ مُحَمَّدٍ كَمَا صَلَّيْتَ
 عَلَى إِبْرَاهِيمَ وَعَلَى آلِ إِبْرَاهِيمَ
 إِنَّكَ حَمِيدٌ مُجِيدٌ
 اللَّهُمَّ بَارِكْ عَلَى مُحَمَّدٍ وَعَلَى
 آلِ مُحَمَّدٍ كَمَا بَارَكْتَ عَلَى
 إِبْرَاهِيمَ وَعَلَى آلِ إِبْرَاهِيمَ
 إِنَّكَ حَمِيدٌ مُجِيدٌ

ALLAHUMMA SALLI ALA MUHAMMADIW WA ALA AALI MUHAMMADIN KAMAA SALLAITA ALA IBRAHIMA WA ALA AALI IBRAHIMA INNAKA HAMIDUM MAJID. ALLAHUMMA BAARIK ALA MUHAMMADIW WA ALA AALI MUHAMMADIN KAMAA BAARAKTA ALA IBRAHIMA WA ALA AALI IBRAHIMA INNAKA HAMIDUM MAJID.

Ô Allah, répanne To Grâce lors Muhammad (saws) et la famille de Muhammad (saws), pareil couma To fine répanne To Grâce lors Ibrahim (as) et la famille de Ibrahim (as). To vraiment digne de louanges et glorieux. Ô Allah, accorde To bane bénédictions à Muhammad (saws) et à la famille de Muhammad (saws), pareil couma To fine accorde To bane bénédictions à Ibrahim (as) et la famille de Ibrahim (as). To vraiment digne de louanges et glorieux.